

Arbeit dauret ein grobes ungeschlachtetes Ros länger als ein Adeliches: Ein zartes Pferd aber ist viel geschickter vnd brauchsamere zu allen dingen.

## Das VI. Capitel.

Wie die Stärcke vnd Geschicklichkeit eines Pferdes/  
vnd ob es schnell vnd flüchtig seye / zuerkennen.



Wann ein Pferd sich umbfehret / vnd Spring thut / die Seiten krümmet / vnd den Schweiff hin vnd wider wirfft / ist ein Zeichen geringer Stärcke / wann es aber sich auff dem Rücken / vnd hinder Gestell hebet / ist es ein anzeigen grosser Stärcke: So es sich starck auff das Mundstuck leget / hat es wenig Kräfte / da es aber zart vnd lind im Maul ist / hat es einen starcken Rücken / vnd so ein Pferd sich in dem bereiten niederleget / vnd auff mancherley weis auff eine vnd die andere Seiten wälzet / vnd so viel ihme möglich / sich mit der wenigen Stärcke so es hat / wehret / damals solle der vernünftige Reiter die Mängel erkennen vnd zeitlich mit geringer Bemühung / Verschonung vnd Schmeichlen den selben abhelffen.

Wann ein Pferd allezeit den Rücken brauchet / vnd darmit hoch gehet / ist ein Anzeigen grosser Stärcke vnd eines dapffern Pferdes: Wann ein solches Pferd im Lauffen oder galoppieren / sonderlich im Tummeln vnd wenden / einen Sprung thut / vnd den Rücken über sich wirfft / hat es noch mehr Stärcke / so es aber vngern zu rücke gehet / ist ein Zeichen geringer Stärcke.

So ein Pferd lieber trabet als galoppieret / oder haufieret / hat es gute Stärck. Wann ein Pferd durchgehen oder aufreissen will / ist ein Zeichen eines schwachen Rückens: So es sich lainet / vnd das Creuz nicht vber sich hebet / auch mit denen vordern Füßen in der Luft zappelt vnd lang bleibet / vnd auff den hindern Füßen gehet / gibts Anzeigen geringer Stärcke.

Das Pferd / so hinten grosse vnd gestreckte abwärts stehende Kniebüß von Natur / vnd gebogene Schienbein hat / ist leicht vnd geringfertig / so es aber kurze Kniebüß / vnd gestreckte Schienbein / auch kurze Hüß hat / das gehet wol von Natur.

Ein Pferd so von Natur dicke Gelenck vnden am Fuß / vnd kurze Fessel hat / ist sehr starck. Das Pferd / so grosse Rippen wie ein Ochß hat / auch einen weiten Bauch / vnd hangenden Rücken / ist gar starck von Natur. Das Pferd / so grosse Kinbacken / vnd einen kurzen Hals hat / ist schwerlich zuzäumen.

Das Pferd / so nicht etwann einen weissen Fuß hat / ist nicht annehmlich vnd zierlich. Ein Pferd so alle vier Hüß weiß hat / die brechen leichtlich / vnd seynd selten starck.

Das Pferd / so grosse hangende Ohren / vnd tieff eingetruckte Augen hat / ist von Natur träg vnd schwach: So es aber grosse Ohren / vnd grosse aufwärts stehende Augen hat / ist es behend vnd feck.

Das Pferd / so ein grosses weitgespaltenes Maul / lange vnd hängere Riemen

fer